



Tom Bennet: maluserie

3. il spieli

di li indenant a rivin feminis cu

la muse intal façolet, par dâ nome une cjalade a lôr fi, intant che l'om al è fûr par lavôr. "...cemût stial?

lassaitmal bussâ. al è cressût, benedet ..."

qualchidune e scrîf in sudizion, peraulis metudis jù cun tant sintiment e pocje gramatiche « ... che mi disi alc dal gno Eugjenio ».

un'altre « us mandi un valie di vincj francs pal

frut, jo o pensi simpri a l'avignî di chê puare creature ». un'altre ancjemò « lassaitmi vignî a viodi la frute, dopo tant timp: par une mari al è un grant dolôr.... ».

i oms no sopuartin che la femine e vedi di provâ dolôr par chel vignadiç, intrûs, cancar, piruç de colpe, fi dal pecjât. invezit di chel tradiment e varessin preferît cjatâle muarte, sì. pluitost.

di chei fruts ricoverâts, an murirà l'otanteun par cent, prin da l'an di

vite. Cul decès dal piçul e pues tacâ une liberazion. ancje se il torment par ducj nol finìs.

un pont indaûr.

il 26 di Otubar dal '17, le dì
prime de disfate, Antonio Anastasio Rossi, vescul di Udin (nassût a Milan) al è
in visite pastorâl a Pradielis e a Ciseriis: *o soi content di sei culi fra lis mêis pioris* - ur dîs (in
talian). po

cul prin sclop le moche spaurît, tornant jù a Udin. al va dret tal ufici di
Cadorna e il gjenerâl i conferme che nol è pericol, ma al viôt che stan fasint
lis valis. Cussì ancje lui al cjape la corse: a pît. Martignà, Sant Denêl,
Pinçan, Spilimberc, Cjasarse, Sacîl: vincjesîs oris. Trevîs e po Rome, cence
fermâsi [[1]].

“model di patriotisim salt e
coragjôs, che al à bandonât la patrie par no subî la vergogne de submission” al
fâs dî. e lui a pene rivât a Rome i scrîf al pape: « ... no soi partît par
viltât, ni par capriç. o soi pront a tornâ ancje a cost di cualsisei disgracie
». biel coragjo: in cjacaris. al reste fin a vuere finide. al tornarà dopo un
an, simpri di corse: il siet di Novembar dal '18, su le automobil dal cont di
Prampero. dut content al scrîf inmò al pape « agrats tant sincîrs ... tal bussâ
le sacre purpure... » po vie a dî messe a Madone di Gracie ... *in*
exitu Israel de Aegypto, domus Iacob de populo barbaro ...

la pôre indaûr e l'inciart indenant,

a fasin gloti a tancj il sen di berlai: “là vâstu, macaco, ce fasistu chi ... po torne
jù a Rome che là tu stâs miôr ...”

mi impensi dal Tàic, un om grant

e grues, che a nô mularie, nus vosave daûr, impirant dôs peraulis cuntun
diovêscul.

mi rint cont cumò di ce brute

blesteme.

fin dal tierç

toc.

finide dal dut

[1]

inte diocesi di Udin, plui di sîs cent
predis (su sîs cent e setantevot) no si son mots, in ubidience a le direttive
dal Vatican che diseve: *“e jê volontât
dal August Pontefiç, che in câs di invasion ducj i ecclesiastics e restin al lôr
puest par puartâ indenant cule dovute abnegazion il propri dovê”*